

Frideege (Autor: Nis Albrecht Johannsen d. J.)

Fri foon't schölj! Nü as't sü wid;
Wörd me ål wat lung.
Fri foon't schölj! En härlik tid,
Än ik lååk än schung!

Häi dåt stååkels iinjmooliinj
Lung ål aw e lör;
Häi sün kraueln önj dåt biinj –
Köö än köö ai mör.

Leed nü stik, penool än bök
Önj jü uterst jarn;
Wård ouers uk je åltu klök,
Ban duch nuch en bjarn.

Ût tu widens wal ik stråks,
Trümle aw e grün,
Beerfötj luup ik dan tu håks
Ma man latje hün.

Wal tu åålen tu besik,
Hääw dåt deer ai hiinj;
Arken däi ap aw e dik –
Foon e wråål wat siinj.

Fri foon't schölj! Nåån, wat'n spal!
Än ik swui man hödj.
Dåt mäi weese as et wal –
Di küster miinj et gödj.

(In: Johannsen, Nis Albrecht. 1956. *Beerid*. Naibel: Andresen. S. 32.)